

ANA no tin fondo disponibel pa cumpra documento di balor historico



ORANJESTAD - Departamento di Archivo Nacional Aruba (ANA) no ta descarta cu tin documentonan cu un gran balor historico den poder di hende particula, y cu ANA lo desea di tin acceso na dje.

Sinembargo ANA no ta dispone di un fondo destina pa cumpra e material historico aki, asina su director sr. Raymond Hernandez a declara na Bon Dia Aruba.

Tin hende cu a yega entrega recuerdonan di nan famia cu un gran balor historico den forma di donacion na ANA, pero no tur tin e mesun pensamiento.

Sr. Hernandez a bisa cu nan a pasa den e situacion aki caba di hendenan cu kier entrega algun documento pero kier wordo paga pe of compensacion material, pero nan no tin fondo.

Sr. Hernandez a bisa cu tin biaha e problema ta sinta cu e persona cu ta ofrece di bende no tin niun idea riba kico nan kier pe. Y di otro banda e eventual cumprado tampoco tin un patronchi pa duna un prijs.

"No tin un instancia na Aruba cu ainda por balora kico ta nifica den placa pa bo por compensa un hende cu algo", el a bisa. Pues den caso cu ANA lo tin fondo disponibel pa cumpra documento historico ta un poco dificil, ya cu no tin un experto pa haci un baloracion di e propiedad.

